

MEMONI JEE MAHFIL

By : M. Aslam Saamla

SOGAAT-E-DERVESH

DARGUZAR

Darguzar karo choonu bahooj asaan aae lekin hin te amal karnu bahooj mushkil. Koi minkay gaar baketo, minjho mazaq udae to, besti kareto, tanz kareto, aaoN khamosh riyaaN toe. Hin laae ke minjhay meiN muqaablay jee himmat nae, taaqat naae. Minkay larai jhagray se tharko laget. Hinjay laae aaoN chup riyaaN toe. Ikhlaaq meiN khamosh riyaaN toe ne ikhlaaq meiN darguzar karaaN toe.

Minjhi soch ke ne minjhay dil ke darguzar karnu saaro natho lagey. Hu minkay gaar bakanta – Dil tarpeto magar zabaan te taro lagaenu khapeto warna zaban khuli vinay ta tufaan achi vineto. Larai jhagrey se shuru thee vinanta. Dushmani bani vineti ne darguzar heenj rai vineti. Asal meiN darguzar koi natho karey. Aj jo insaan darguzar jo matlab jaareiNj natho. Hee naikee hunkay khabar he naae. Darguzar meiN chupelo

khuloos koi key bhi nae khabar. Darguzar meiN jo pehlay khushi milni vee ne jo sukoon milno vo hoo haareiN nae milnu. Darguzar se chetu aj akro laa-ilaaj zakham aae jo vadhnooj riyeto.

DERVESH: EHRAY
DARGUZAR KARAN SE
DARGUZAR NAAJ KAR.

EHSAAS

Har koi heej samjheto ke paaNjo koi ke ehSaas nae, piyaar jo, khushi jo, gum jo, sukh jo, dukh jo, takleef jo ehSaas nae ne he shikayat har koi ke har koi se aae. Kadey galat fehmi, gusso, nafrat ehSaas ke khatam kari vijheto. Hin tarha akaray biyan se nafrat dushmani judai ne larai paida thiyeti pachay barbadi thiyeti. Kin ke kin se kuro ehSaas thiyeto hee kadey khabar nahti thee sighay kure laae ke ehSaas jazbaat jee akri soch aae. Soch badleti ta ehSaas bhi badleto. Maru baeri jo bachein jo ehSaas, bha ne bhein jo vadey nandhey jo ehSaas. Insaan ehSaas tey qaabu natho kari sighay balkay ehSaas insaan

ke qaabu meiN rakheto.
Ehsaas paaN ke ida se uda
kari vjheto.

***DERVESH ZINDAGI JO EHSAAAS
AAE.***

MOTIYAN JEE MALA

- Jin tarha jism paani ke saaf kareto hin tarha dil sachhai se paak thiyeto.
- Zehan jee beenai se akh jee beenai behtar aae.
- Dosti meiN shak zehar aae.
- Naik maru ke dushman se bhi faedo thiyeto.
- Har maru ki na ki aqal rakheto lekin har maru aqal se kam natho giney.
- Tareef jay qaabil hu aae jo musaafir ke sidho rasto dekhareto.
- Tareef jay qaabil hu aae jo aakhrat jee fikar kareto.
- Jo vadharey pucheto hu vadharay sikheto.
- Jo aalim hoe ne potejay ilm te amal na karey ta hu ehro bimaar aae jin jay wattay dawa ta mojud aae lekin ilaaj nae.
- Mushkilaaj jo behtareen tareeqo soch ne fikar aae.

For comprehensive information
on

*Origin, history, culture, language and
welfare activities of Memon Community*

Visit

www.memon-world.net

send your comments to

arthaplawala@yahoo.com